




卷二百三十九之二十四  
經籍

行  
7伊4  
1046  
65





74  
1046  
65

文獻通考卷之二百三十九

鄱陽 馬 端臨 貴與 著

經籍考

空青遺文十卷

陳氏曰直寶文閣曾紆公卷撰紆布之子有異材建中靖國初布在相位奉詔為景靈西宮碑紆之筆也建炎紹興之際將漕江浙入為司農少卿知信衢州以卒汪彥章志其墓孫仲益序其文王銍性之其壻也

孫鴻慶序公文章固守家法而學詩以母夫人魯國魏氏為師句法清麗絕去刀尺有古詩之風黃魯直遷宜州道出零陵得公江越書事二小詩書團扇上諸詩人莫能辨也

利  
289  
61



文獻通考卷之二百三十九

先公存略曰余自誦涪翁扶藜對蘄之吟曲阜把卷臨燈之句固已慕用公衮才章之盛顧前脩日遠自乾淳諸老文字猶多遺落况過江前後間乎一日西泉吳太史為言此吾鄉空青公也有集藏于家余惟空青公子弟起家文章繼世潛逃於家君柄用之時纏綿於諸賢流落之後未幾滅跡毀廬相隨入黨迄天地重開迨能以三朝正論暴白於世視同時諸貴公子孫所謂繼志述事者其為人賢不肖何如也昔石林葉公以親見楊雄羨其詩以新樣元和評其書以三世風流頌其父近世李鴈湖亦謂人惡雋異俗疵文雅如空青諸人雖不偶於一時而文采爛然垂後著世不能掩也今其遺文如魯駸秦碑見者珍惜自可孤行於南豐曲阜之後云

陳氏曰中書舍人信安程俱致道撰俱父祖世科而俱乃以外祖鄧潤甫蔭入仕宣和中賜上舍出身為南宮舍人紹興初入西掖徐俯為諫大夫封還詞頭罷去後以次對修史病不能赴而卒

石林葉氏序略曰余居吳始識致道見其學問風節卓然有不獨見於其文者即為秘書當路并上其文數十篇宰相見而驚曰今之韓退之也亟召見政事堂其後二十四年間卒登侍從為天子掌制命文章擅一時今觀其文精確深遠議論皆本仁義而經緯錯綜之際則左丘明班孟堅之用意也至於詩章兼得唐中葉以後名士衆體晚而在朝雖不久遇所建明允偉蓋其為人剛介自信釋於理者明所行寧失之隘不肯少貶以從物是以善類皆相與推先惟恐失之雖有

不樂之者亦不敢秋毫加疵病信乎直道之不終屈也  
陵陽集五十卷

陳氏曰中書舍人仙井韓駒子蒼撰自幼能詩黃大史稱其  
超軼絕塵蘇文定以此儲光羲游太學不第政和初獻書召  
試出身後入西掖坐蘇氏鄉黨曲學罷

丹揚集四十二卷 後集四十二卷

陳氏曰顯謨閣待制江陰葛勝仲魯卿撰紹聖四年進士元  
符三年詞科洪慶善序其文有所謂絕郭天信拒朱勳慙盛  
章而怒李彥者蓋其平生出處之略也再知湖州後遂家焉  
孫鴻慶序略曰公中宏詞第一時天子輯瑞應蒐講彌文報  
禮上下四方以符瑞來告者不可勝數大臣表賀皆出公手  
壞奇英麗獨步一時公卿交譽屢遷權大司丞遂躋法從

毗陵集五十卷

陳氏曰參政文清毗陵張守全貢撰一字子同崇寧進士詞  
科紹興執政張魏公在相位為秦檜再用守有力馬一日與  
魏公言某誤公聽今朝文同班列得欵曲其人似以曩者一  
跌為戒有患失心宜自劾謝上魏公為作墓志著其語

張章簡華陽集四十卷

陳氏曰參政金壇張綱彥正撰大觀中舍法三中首選擇揭  
為承事郎辟雍正蓋專於新學者紹興初在瑣闥許張俊求  
去復與秦隙遂引年秦亡乃召用乾道初年八十四而終自  
號華陽老人華陽者茅山也

非有齋類藁五十卷

陳氏曰給事中吳興劉一止行簡撰宣和三年進士居瑣闥

文獻卷二百廿九

經籍考

三

僅百餘日忤秦檜罷去閑居十餘年以次對致仕檜死被召  
刀辭進雜學士而終年八十二實紹興庚辰  
竹西集十卷 西垣集五卷

陳氏曰兵部侍郎維揚王居正剛中撰宣和三年進士紹興  
初入詞掖西垣集者制單及繳章也其篇目凡繳章皆云封  
還詞頭蓋其子孫編次者之失也除授則有詞頭政刑庶事  
何詞頭之有

張巨山集三十卷

陳氏曰中書舍人光化張嶠巨山撰嶠為司勳郎官金人再  
取河南秦相皇恐上章引伊尹善無常主及周任不能者止  
之文以自解嶠之筆也秦德之遂擢修注掌制而其具彙倉  
卒誤以伊尹告太甲為告湯及周任之言為孔子自言時祕  
書省寓傳法寺有書其門曰周任為孔聖太甲作成湯秦疑  
諸館職為之多被迷然嶠亦以答檜三折肱之語謂其貳於  
已無幾亦罷

默成居士集十五卷

陳氏曰中書舍人潘良貴子賤撰一字義榮剛介之士也朱  
侍講序其集略見其出處大致

朱子序略曰公自宣和初為博士則已不肯託昏富貴之家  
而獨嘗論斥大臣蒙蔽之姦及為館職又不肯游蔡京父子  
門使淮南又不肯與中官同燕席靖康召對因論時宰何舉  
唐恪不可用恐誤國事以是謫去不旋踵而言果驗建炎初  
召為右司諫首論亂臣逆黨當用重典以正邦法壯國威且  
及當時用事者姦邪之狀大為汪黃所忌書奏三日而左遷

以去紹興入為都司又忤時相以歸復為左史直前奏事明  
大公至正之道服喪還朝又以廷叱奏事官而忤旨以去自  
是之後秦檜擅朝則公遂廢於家而不復起矣然公平生廉  
介自持自少至老出入三朝而前後在官不過八百六十餘  
日所居僅施風雨郭外無尺寸之田經界法行獨以丘墓之  
寄輸帛數尺而已其清苦貧約蓋有人所不堪者而處之超  
然未嘗少屈於檜其子燿暴起鼎貴勢傾內外亦未嘗與通  
問也嘗誦君子三戒之言而深以志得之規痛自儆鈔至於  
造次之間一言一行凡所以接朋友教子弟亦未嘗不以孝  
弟忠敬節儉正直防微謹獨之意為本其讀書磨鏡之喻切  
中學者之病當世蓋多傳之而所論汲長孺蓋寬饒之為人  
尤足以見其志之所存也嗚呼若公之清明直諒確然亡愆  
其真可謂剛毅而近仁矣夫以三代之時聖人之世而夫子  
已嘆剛者之不可見况於百世之下幸有如公者焉而不得  
少申其志以沒其條奏草藁有補於時可為後法者又以公  
自焚削而不復存其平生之言頗可見者獨有賦詠筆札之  
餘數十百篇而已後之君子蓋將由此以論公之事其可使  
之沒沒無傳而遂已乎

筠谿集二十四卷

陳氏曰戶部侍郎連江李彌遜似之撰大觀三年上舍第一  
知冀州能抗金賊攝江東帥與忠定平周德之亂晚為從官  
沮和議坐廢而終

鄱陽集十卷

陳氏曰徽猷閣直學士鄱陽洪皓光弼撰皓奉使金虜守節

不屈既歸為秦所忌謫英州死之自與秦適相先後三子登  
詞科俱顯貴

東窓集四十卷

陳氏曰中書舍人鄱陽張廣彥實撰與呂君仁為詩友其在  
西掖當紹興十一年

雪溪集略八卷

陳氏曰汝陰王銍性之撰國初周易博士昭素之後也其父  
莘樂道嘗從歐公學銍為曾紆壻嘗撰七朝國史紹興初常  
同子正薦之詔視秩史官給札奏御會秦氏柄國中止書竟  
不傳其子明清著揮麈錄

竹軒雜著十五卷

陳氏曰太常少卿永嘉林季仲懿成撰以趙元鎮薦入朝奏

疏沮和議得罪仲熊叔豹季狸其弟也皆知名

北山集三十卷

陳氏曰端明殿學士金華鄭剛中亨仲撰紹興二年亞魁受  
知秦相使川陝後忤意貶死封州

澹庵集七十八卷

陳氏曰端明殿學士忠簡廬陵胡銍邦衡撰建炎甲科第五  
人既上書乞斬秦檜謫嶺海秦死得歸孝宗即位始復官召  
用又以沮再和之議得罪去乾道中入為丞郎亦不容於時  
奉祠至淳熙七年乃終七十九

平園周氏跋曰胡忠簡公詩有不可及者三用事博而精下  
語豪而華一也士子投獻必用韻酬答雖百韻亦然愈多而  
愈工二也此篇和王君行簡時年七十五長歌小楷與四五



十人無異三也

誠齋序先生之文肖其為人議論閎以挺其記序古以馴其  
代言典而嚴其書事約而悉其為詩蓋自詆斥時宰誕置嶺  
海愁沈酸骨飢蛟血牙風呻雨喟濤譎波詭有非人間世之  
所堪耐者不芥於心而反昌其詩視李杜夜郎夔子之音益  
加恢竒云至於騷詞涵茫蘄萃鉢剝刻屈抉天之幽洩神之  
瘦槁癯而不瘁恫愀而不懟自宋玉而下不論也

李文簡公集一百二十卷

敷文閣學士丹稜李燾仁父撰水心集序曰自有文字以來  
名世數十大抵以筆勢縱放凌厲馳騁為極功風霆怒而江  
河流六驥調而八音和春輝秋明而海澄嶽靜也高者自能  
餘則勉而効之矣雖然此韓愈所謂下逮莊騷其上無是也

觀公大篇詳而正短語簡而法初未嘗藻黼琢以媚俗為  
意曾點之瑟方希化人之酒欲清又非以聲色臭味自怡悅  
也獨於古文墜學堂上之議起（雲造周如挈裘領振之焉固  
遺其下而獨至其上者歟蜀有三蘇死公父子兄弟後起兼  
方合流以就家學綜練古今名實之際有補於世天下傳以  
繼蘇氏云

沈子壽文集

水心集序曰吳興沈子壽少入太學名聞四方仕四十餘年  
繼於王官再入郡三佐帥幕公私憔悴而子壽老矣然其平  
生業嗜文字若性命在身非外物也甲乙自著累百千首嗚  
呼何其勤且多也余後學也不足以識子壽之文其不為音  
險而瑰富精切自然新美使讀之者如設芳醴珍穀足飲饜

食而無醉飽之失也又能融釋衆疑兼翹空寂讀者不惟醉飽而已又當消愠忘憂心舒意閑而自以為有得於斯文也觀其開闔疾徐之間旁觀而橫陳逸鷲而高翔蓋宗廟朝廷之文非自娛於幽遠淡泊者也

徐斯遠文集

水心集序曰斯遠盡平生又僅二十餘首首輒精善疑其親自料揀應留者止此爾徐觀筆墨輕重以十一斂藏千百雖鋪寫縱放亦無怠隋剥落之態迷流陡起體勢各成殆非精揀所能致也詩險而肆對面崖壑咫尺千里操舍自命不限常律慶曆嘉祐以來天下以杜甫為師始黜唐人之學而江西宗派章焉然而格有高下技有工拙趣有淺深材有大小以夫汗漫廣莫徒枵然從之而不足充其求曾不如脰鳴吻映出豪芒之奇可以運轉而無極也故近歲學者已復稍趨於唐而獲焉曷若斯遠淹玩衆作凌暴僂蹇情瘦而意潤貌枯而神澤既能下陋唐人方於宗派斯又過之斯遠有物外不移之好負山林沉痾之疾而師交學問小心抑畏異方名聞之士未嘗不遐歎長想千里而同席也初渡江時上饒號稱賢俊所聚義理之宅如漢許下晉會稽焉風流幾泯議論將絕斯遠與趙昌父韓仲止扶植遺緒固窮一節難合而易忤視榮利如土梗以文達志為後生法凡此皆強為善者之所宜知也

相山集二十六卷

陳氏曰朝奉大夫濡須王之道彥猷撰宣和六年兄弟三人同登科建炎寇亂率衆保明避山從之者皆得免以功改京

文獻卷二百廿六  
官沮和議得罪晚乃歷麾節其子蘭被遇阜陵貴顯  
韋齋小集十二卷

陳氏曰吏部員外郎新安朱松喬年撰侍講文公之父也文公嘗言韋齋先生自為兒童時出語已驚人及去場屋始放意為詩文其詩初亦不事彫飾而天然秀發格律閒暇超然有出塵之趣

關博士集二十卷

陳氏曰太學博士錢塘關注子東撰紹興五年進士嘗為湖州教授自號香巖居士

石月老人集三十五卷

陳氏曰朝議大夫致仕鄱陽余安行勉仲撰安行累舉不第其子應求以童子登崇寧五年進士科為御史歷麾節所至迎養其父至九十六乃終著書親至言蓋純篤之士也

王著作集四卷

陳氏曰著作郎福清王蘋信伯撰從程門學以趙忠簡薦召對賜出身秦檜惡之會其族子坐法牽連文致奪官以死  
屏山集二十卷

陳氏曰通判興化軍崇安劉子翬彥冲撰父鞬兄子羽子翬以蔭入仕年甫四十八而卒朱文公其門人也嘗謂朱曰吾少聞佛老之說歸讀吾書然後知吾道之大體用之全如此於易得入德之門為作復齋銘聖傳論可以見吾志矣

東溪集二十卷

陳氏曰迪功郎漳浦高登彥先撰考試潮州策問忤秦相謫死

水心葉氏序略曰君高遠獨出無拘留泥滓間意學已成謂當直施用不曲步捷行以漸巧取之論說必窮盡欲破時陋扶世壞文不為扶疎茂好惟自根極而成者無不具也故不得志於科舉至轉富入貧本業微折終不動心一以溪山雲月為家宅筆墨簡策為情性常覃研竟日曰孔顏不如是也

緡經堂集八卷

陳氏曰知盱台軍東平畢良史少董撰文簡公士安五世孫嘗陷虜有從之游者因為圖名緡經寫其訪問紬繹之狀

三近齋餘錄

朝奉郎知信州王從正夫撰從文正公五世孫有詩文四百八十餘篇自題三近齋餘錄楊誠齋序略曰其詩如落木森猶力寒山淡欲無如地迨高樓目天寒故國心如涼風回遠笛暝色帶歸舟如塵心依水靜歸鬢與山青不減晚唐諸子如墮盡應輸燕子懶寒猶及占梨花如一番風雨催寒食千里鶯花想故園如身閑更得憑陵酒花早殊非愛惜春如秋生列岫雲尤薄泉瀨懸崔路更怪置之江西社中何辨幽蘭云臨春慘不舒蓋國空自香意不在蘭也至於騷辭如釣臺沐髮乞巧悼亡等篇出入遠游天問之流頓頓幽通思玄之固矣及上前論事之文皆卓然近用又如簋殮豆肉之可以求飽筭裳篋續之可以御冬使其遇合功用詎可量哉紀之麤鄭之瓚積而不離塵而不起久則光怪四出貫日襲月有不可掩者惟不求知所以不可掩也歟

藥寮叢藁二十卷

陳氏曰太常少卿上蔡謝俊景思撰參政克家之子

水心葉氏序略曰崇觀後文字散壞相矜以浮肆於險膚無  
據之辭苟以蕩心意移耳目取貴一時雅道盡矣謝公尚童  
子脫州髦游太學俊筆湧出排窄老蒼而不能不受俗學薰  
染自漢魏根底齊梁波流上溯經訓旁涉傳記門樞戶鑰庭  
旅陞列撥棄組繡考擊金石洗削纖巧完補太璞其藥園小  
畫記蓋謝靈運山居之約言志潔而稱物芳無憂憤不堪之  
情也

巖壑老人詩文一卷

陳氏曰五朝請大夫洛陽朱敦儒希貞撰初以遺逸召用嘗  
為館職既挂冠秦檜之孫墳欲學為詩起希貞為鴻臚少卿  
將使教之

鶴溪集十二卷

陳氏曰辟雍博士青田陳汝錫師子撰紹聖四年進士持節  
數路帥越而卒青田登科人自汝錫始希點子與其孫也

岳武穆集十卷

陳氏曰樞副鄴郡岳飛鳴舉撰飛功業偉矣不必以集著也  
世所傳誦其賀和議成一表當亦是幕客所為而意則出於  
岳也

漢濱集六十卷

陳氏曰參政襄陽王之望瞻叔撰周益公為集序序略曰公  
生於羊社成功之地慕其為人博學能文知略輻濩學根於  
經故有淵原文適於用故無枝葉奏劄甚多皆可行之言內  
制雖少得坦明之體酷嗜吟詠詞贍而理到近世論文章事  
業公實蕪之豈與夫一偏一曲之士較短量長而已

玉山翰林詞草五卷

陳氏曰尚書玉山汪應辰聖錫撰紹興五年進士首選本名洋御筆改賜天才甚高而不喜為文謂不宜弊精神於無用然每作輒過人以天官兼翰苑近二年所撰制誥溫雅典實得王言體朱晦翁稱為近世第一

太倉稊米集七十卷

陳氏曰樞密編修宣城周紫芝少隱撰自號竹坡居士

白蘋集四卷

陳氏曰右文林郎單父龐謙孺祐甫撰莊敏公籍之曾孫也  
用季父恩仕不遂而死韓南澗忘其墓嘗客居吳興故集名白蘋

南澗甲乙藁七十卷

陳氏曰吏部尚書潁川韓元吉無咎撰門下侍郎維之玄孫與其從兄元龍子雲皆嘗試詞科不利居廣信溪南號南澗艇齋雜著一卷

陳氏曰南豐曾季狸喪父撰筆之弟曰湘潭主簿宰宰之孫曰大理司直晦之季狸其子也多從呂居仁徐師川游嘗一試禮部不中乾淳間名公多敬畏之具見其子澠所集師文尺牘此篇蓋其議論古今之文辭質而義正可以得其人之大略

溪園集十卷

陳氏曰蘄春吳億大年撰其父擇仁為尚書億仕至靜江俸君餘千有溪園佳勝世傳其樓雪初消詞為建康帥晁謙之作

于湖集四十卷

陳氏曰中書舍人歷陽張孝祥安國撰甲戌冠多士出思陵親擢秦相孫瑱遂居其下秦忌惡之以他事下其父子大理獄明年秦亡上既素眷不五年登法從阜陵尤眷之不幸不得年死時才四十餘上常有不用不盡之嘆其文翰皆超世之才也

南軒集三十卷

陳氏曰待講廣漢張栻欽夫撰魏忠獻公浚之長子當孝宗朝以任子不賜第入西掖者韓元吉劉孝建其入經筵則栻也

王司業集二十卷

陳氏曰國子司業宛丘王逵致君撰建炎初其家避狄汭汭

南下逵年十一偶小泊登岸虜適至亟解維不暇顧遂失之在虜十年間關得歸其父工部尚書俱既歸入太學登癸未科為諫官御史歷麾節終於少司成

周平園序略曰公志氣強學問博其文章贍而不失之泛嚴而不失之拘議論馳騁於數千百載之上而究極利害於四方萬里之遠其為歌詩慷慨憂時而此興存焉他文闕辨該貫直欲措諸事業所謂援古證今黼黻其辭特餘事耳

浮山集十六卷

陳氏曰左朝請大夫江都仲弁彌性撰紹興壬子進士晚丞光祿寺得知蘄州弁嘗竹湖籍中有所盼為作生朝青詞好事傳誦之遂漏露坐謫官其別詞路曰爾為瀆悔之詞曾不知畏天其知畏吾法乎吾鄉前輩能道其事如此

周平園序略曰彌性自少卓犖不群潛心問學力排王氏一  
備之說惟六藝孔孟是師筆勢翩翩俊聲籍甚古律如王良  
造父馭駿馬駕車有犇軼絕塵之勢其賡險韻如繭抽絲印  
印泥愈出愈新送妹長編孝友慈愛溢於言外殆欲上規風  
雅其四六叙事雖閑肆而關鍵實密對屬雖切而非駢儷所  
能拘最後蘇州謝上表以古文就今體自成一家雜著題跋  
清雅可愛復以餘力出入釋氏游戲歌詞無不過人

小醜集十二卷 續集三卷

陳氏曰直祕閣眉山任盡言元受撰元符諫官伯雨之孫紹  
興從臣申先之子甲科仕為太常寺主簿終於閩憲  
揚誠齋序謂其詩文孤峭而有風稜雄健而有英骨忠慨而  
有義氣蓋將與唐之貞元元和本朝之慶曆元祐諸公並轡

而先終非近世陳陳相因累累隨行之作也

拙齋集二十二卷

陳氏曰校書郎候官林之奇少穎撰之奇學於呂氏本中而  
太史祖謙學於之奇其登第當紹興辛未年已四十未幾即  
入館方卿用而得末疾

霜傑集三十卷

陳氏曰德興董穎仲達撰紹興初人從江彦章徐師川游彦  
章為作序

妙峯集四十卷

陳氏曰中書舍人福清林通述中撰元符三年甲科苗劉之  
變在西掖不夫節思陵嘉之終龍圖直學士

鄧峯真隱漫錄五十卷



陳氏曰丞相文惠公四明史浩直翁撰

論癡符二十卷

陳氏曰御史臨海李庚子長撰論之義術備也市人鬻物於市誇號之曰論此三字本出顏氏家訓以譏無才思而流布醜拙者以名其集示謙也庚乙丑進士以湯鵬舉薦辟入臺家藏書甚富

梯雲集二十五卷

陳氏曰中書舍人資川趙逵莊叔撰辛未大魁有氣節四十一歲卒

海陵集三十二卷

陳氏曰同知密院海陵周麟之茂振撰乙丑進士戊辰詞科既執政被命使虜亮辭行得罪去

胡獻簡詞垣草四卷

陳氏曰禮部尚書會稽胡沂周伯撰

介庵集十卷

陳氏曰左司郎官趙彥端德莊撰乾淳間名士也嘗宰餘干趙忠定其邑人初冠多士德莊在朝往謁謝德莊語之曰謹勿以一魁先置曾中可謂名言

文獻通考卷之二百三十九

文獻通考卷之二十四

鄱陽 馬 端臨 貴與 著

經籍考

集

石湖集一百三十六卷

陳氏曰參政吳郡范成大至能撰初以起居郎使虜附奏受書事抗虜於其殿陛間歸時益被上眷以至柄用石湖在太湖之濱姑蘇臺之下去城十餘里面湖為堂號鏡天閣又一堂扁石湖二字阜陵宸翰也今日就荒毀更數年恐無復遺跡矣一再過之為之慨然

誠齋序其集曰公訓誥具西漢之爾雅賦篇有杜牧之之刻深騷辭得楚人之幽遠序山水則柳子厚序任俠則大史遷

至於大篇决流短章歛芒縉而不釀縮而不儉清新嫵媚奄有鮑謝奔逸雋偉窮追太白求其隻字之陳陳一唱之嗚嗚而不可得也今四海內詩人不過三四而公皆過之無不及者予於詩豈敢以千里畏人者而於公獨歛衽焉

周益公集二百卷 年譜一卷 附錄一卷

陳氏曰丞相文忠益公廬陵周必大子充撰一字弘道其家既刊六一集故此集編次一切視其凡目其間有奉詔錄親征錄龍飛錄思陵錄凡十一卷以其多及時事託言未刊人莫之見鄭子敬守吉募工人即得之余在莆田借錄為全書然漫其數十處益公自號平園叟

後村劉氏曰平園晚作益自磨礪然散語終是洗滌詞科氣習不盡惟所撰林艾軒誌銘極簡嚴有古意

渭南集三十卷 劔南詩藁續藁八十七卷

陳氏曰華文閣待制山陰陸游務觀撰左丞佃之孫紹興末召對賜出身隆興初為密院編修官鄉用矣坐漏泄省中語阜陵以為反覆斥遠之後以夔倅入蜀益自放肆不護細行自號放翁在蜀九年乃歸晚由嚴陵召為南宮舍人將內禪周益公薦其直北門上終不用及韓氏用事游既挂冠久矣有幼子澤不逮為侏胄作南園記起為大蓬遂以次對再致仕嘉定庚午年八十六而終游才甚高幼為魯吉父所賞識詩為中興之冠他文亦佳而詩最富至萬餘篇古今未有故文與詩別行渭南者封渭南縣伯

復齊制表二卷

陳氏曰刑部侍郎王柎嘉叟撰初寮安中之孫紹興乾道間

名士也陸放翁與之厚善

盤洲集八十卷

陳氏曰丞相文惠公鄱陽洪适景伯撰忠宣之長子方奉使時文惠甫十三歲後與其弟遵同中壬戌宏博科本名造後改焉又三年乙丑弟邁繼之世號三洪其自淮東總領入為太常少卿一年而入右府又半年而拜相然在位僅三閱月為林安宅所攻而去嘗一帥越閑居十六年而終

小隱集七十卷

陳氏曰樞密文安公洪遵景嚴撰其進用最先於兄弟而得年不永薨於淳熙元年

野處類藁二卷

陳氏曰翰林學士文敏公洪邁景盧撰其全集未見

誠齋集一百三十三卷

陳氏曰寶謨閣學士文節公廬陵楊萬里廷秀撰嘗淳熙末為大蓬論思陵配享不合去及韓侂胄用事召之卒不至自次對遷至學士聞開禧出師不食而死自作江湖集序曰予少作有詩千餘篇至紹興壬午皆焚之大槩江西體也今所存曰江湖集者蓋學后山及半山及唐人者也

荆溪集序予之詩始學江西諸君子既又學后山五字律既又學半山老人七字絕句晚乃學絕句於唐人學之愈力作之愈寡嘗與林謙之屢歎之謙之云擇之之精得之之艱又欲作之之不寡乎之官荆溪嘗以告曰作詩忽若有寤於是辭謝唐及工陳江西諸君子皆不敢學而後欣如也

南海集序予好為詩初好之既而厭之紹興壬午予詩始變

予乃喜既而又厭之至乾道庚寅詩又變淳熙丁酉詩又變時假守毗陵友人元延之云予詩每變每進今老矣未知能變否能變矣未知能進否

程文簡集二十卷

陳氏曰吏部尚書新安程大昌泰之撰每卷分上下其實四十卷也博學長於考究著述甚多皆傳於世

樵隱集十五卷

陳氏曰信安毛升平仲撰禮部尚書友之子負才傲世仕止州倅與尤遂初厚善臨終以書別之囑以志墓延之既為銘又序其集

梁溪集五十卷

陳氏曰禮部尚書錫山元表延之撰家有遂初堂藏書為近

世冠

鄭景望集三十卷

陳氏曰宗正少卿永嘉鄭伯熊景望撰

歸愚翁集二十六卷

陳氏曰秀州判官鄭伯英景元撰近世永嘉學者推二鄭伯熊紹興乙丑進士自條興初為館職王府東宮官至少司成宗正卿用矣每小不合輒乞去卒於建寧守伯英癸未甲科第四人以親養三十年不調竟不出二人皆豪傑之士也水心葉氏序曰余嘗嘆章蔡氏擅事秦檜終成之更五十六年閉塞經史滅絕理義天下以佞諛鄙淺成俗豈惟聖賢之常道隱民彞并喪矣於斯時也士能以古人源流前輩出處終始執守慨然力行為後生率非瓌傑特起者乎吾永嘉二

鄭公是已蓋長曰伯熊字景望李曰伯英字景元大鄭公恂  
恂少而德成經為人師深厚憫悞無一指不本於仁義無一  
言而不關於廊廟而景元俊健果決論事憤發思得其志則  
必欲盡洗紹聖以來弊政復還祖宗之舊非隨時默默苟為  
祿仕者也景望徇道寂寞視退如進官至宗正少卿而止初  
景元中進士第第四人少卿喜而笑曰子一日先我矣然既  
任秀州判官遂以親辭終其身二十餘年不復仕朝廷亦卒  
不徵用何者諸公貴人知其才大氣剛中心畏之方以其自  
重不浪出無能害已為幸而不暇以發格科目摧折名士為  
已責故也豈不悲哉自二鄭公後儒豪接踵而永嘉與為多  
然皆兄事景元方其家居得朋友通其有無並坐接席不知  
歲月遷改自謂如華胥至樂故其講習見聞尤精而片辭半

簡必獨出肺腑不規倣眾作也夫孔翠鸞鳳矜其華采顧景  
自耀為世珍惜是既然矣若夫蛟龍之興雲雨則雷電皆至  
霍靈百里豈區區然露小技術細巧而足哉余懼覽者未察  
因次其本末如左

晦庵集一百卷 紫陽年譜三卷

陳氏曰侍講文公新安朱熹元晦撰年譜李方子公晦所述  
其門人也

勉齋黃氏曰周程張邵之書所以繼孔孟道統之傳歷時未  
久微言大義鬱而不章為之哀集發明而後得以盛行於世  
太極先天圖精微廣博不可涯涘為之解剝條畫而後天地  
本原聖賢蘊奧不至於泯沒程張門人祖述其學所得有淺  
深所見有疏密先生既為之區別以悉取其所長至或識見

小偏流於異端者亦必研窮剖拆而不沒其所短南軒張公東萊呂公同出其時先生以其志同道合樂與之交至或見識少異亦必講磨辨難以一其歸至若求道而過者病傳註誦習之煩以為不立文字可以識心見性不假脩為可以造道入德守虛靈之識而昧天理之真借儒者之言以文佛老之說學者利其簡便詆訾聖賢捐棄經典猖狂叫呼側辟固陋自以為悟立論愈下者則又崇獎漢唐比附三代以便其計功謀利之私二說並立高者陷於空無下者溺於卑陋其害豈淺淺哉先生力排之俾不至亂吾道以惑天下於是學者靡然向之先生教人以大學論孟中庸為入道之序而後及諸經以為不先乎大學則無以提綱挈領而盡語孟之精微不參之以論孟則無以融會貫通而極中庸之旨趣然不會其極於中庸則又何以建立大本經綸大經而讀天下之書論天下之事哉其於讀書也又必使之辨其音釋正其章句玩其辭求其義研精覃思以究其所難知平心易氣以聽其所自得然為已務實辨別義利毋自欺謹其獨之戒未嘗不三致意焉蓋亦欲學者窮理反身而持之以敬也從游之士迭誦所習以質其疑意有未諭則委曲告之而未嘗倦問有未切則反復戒之而未嘗隱務學篤則喜見於言進道難則憂形于色講論經典商畧古今率至夜半雖疾病支離至諸生問辯則脫然沉疴之去體一日不講學則惕然常以為憂搢衣而來遠自川蜀文詞之傳流及海外至於夷虜亦知慕其道竊問其起居窮鄉晚出家蓄其書私淑諸人者不可勝數先生既沒學者傳其書信其道者益眾亦足以見理義

之感於人者深矣繼往聖將微之緒啓前賢未發之機辯諸  
儒之得失闢異端之訛繆明天理正人心事業之大又孰有  
加於此者至若天文地志律曆兵機亦皆洞究淵微文詞字  
畫騷人才士疲精竭神嘗病其難至先生未嘗用意而亦皆  
動中規繩可為世法是非姿稟之異學行之篤安能事事物  
物各當其理各造其極哉學脩而道立德成而行尊見之事  
業者又如此秦漢以來迂儒曲學既皆不足以望其藩牆而  
近代諸儒有志乎孔孟周程之學者亦豈能以造其間域哉  
嗚呼是迨天所以相斯文焉篤生哲人以大斯道之傳也

習庵集十二卷

陳氏曰戶部侍郎曾逮仲躬撰文清公幾之子

東萊呂太史集十五卷

別集十六卷

外集五卷

附錄三卷

陳氏曰著作郎東萊呂祖謙伯恭撰其弟祖儉編錄九家範  
尺牘之類編之別集策問宏詞程文之類總之外集年譜遺  
事則見附錄太史曾文清外孫隆興癸未鎖廳甲科宏詞亦  
入等仕未達得末疾奉祠年才四十五卒於淳熙辛丑平生  
著述皆略舉端緒末有成書者學者惜之

大愚叟集十一卷

陳氏曰太府寺丞呂祖儉子約撰祖謙弟也慶元初上封事  
論救祭酒李祥謫高安以沒寓居大愚寺故以名集

千巖擇藻七卷

外編三卷

續編四卷

陳氏曰知峽州三山蕭德藻東夫撰嘗宰烏程後遂家焉楊  
誠齋序其集曰近世詩人若范石湖之清新尤梁溪之平淡  
陸放翁之敦腴蕭千巖之工致皆余所畏也



濟溪老人遺藁一卷

陳氏曰通判明州濟源李迎彥將撰永嘉周淳泚先生之壻與先大父為襟袂集中有送先君子赴戊子秋試詩首句籍甚人言易已東蓋先君治易故也集序周益公作

泚庵集四十卷

陳氏曰新津任淵子淵撰紹興乙丑類試第一人仕至潼川憲嘗註山谷后山詩行於世新津有天社山故稱天社任淵方州集五十卷 後集二十卷

陳氏曰資陽李石知幾撰石有盛名於蜀少嘗客蘇軾尚書家紹興末為學官乾道中為郎歷麾節皆以論罷趙丞相雄其鄉人也素不善石石以是晚益困其自序云宋黽魯倉今猶古也

愚集二十卷

陳氏曰吏部侍郎葛立方常之撰勝仲之子丞相邴之父也以郎官攝西掖忤秦相得罪更化召用言者又以為附會沈該罷去遂不復起

綺川集十五卷

陳氏曰大常寺主簿歸安倪偁文舉撰紹興八年進士齊齋之父

象山集二十八卷 外集四卷

陳氏曰知荆門軍金谿陸九淵子靜撰與其兄九齡子壽乾淳間名士也象山貴溪結茅其上與士友講學山形如象故名

朱子答項平父書曰大抵子思以來教人之法惟以尊德性

道問學為用力之要今子靜所說專是尊德性而熹平日所論却是問學上多了所以為彼學者多持守可觀而看得義理全不子細又別說一種杜撰道理遮蓋不肯放下而熹自覺雖於義理上不取亂說却於緊要為已為人者多不得力今當返身用力去短集長庶不墮一偏耳

又答孫敬甫書曰陸氏之學在近年一種浮淺頗僻議論中固自卓然非其儔匹其徒博習亦有能脩其身能治其家以施之政事之間者但其宗旨本自禪學中來不可掩諱當時若只如晁文元陳忠肅諸人分明招認著實受用亦自有得力處不必如此隱諱遮藏改名換姓欲以欺人而人不可欺徒以自欺而自陷於不誠之域也然在吾輩須知其如此而勿為所惑若於吾學果有所見則彼之言釘釘膠粘一切假

合處自然解拆破散收拾不來矣切勿與辨以啓其紛爭不遜之論而反為下莊子所乘也少時喜讀禪學文字見果老與張侍郎書云左右既得此欄柄入手便可改頭換面却用儒家言語說向士夫接引後來學者其意大略如此不能盡記其語後見張公經解文字一用此策但其遮藏不密線索漏處多故讀者一見便知其所自來難以純自託於儒者若近年則其為術益精為說浸巧拋閃出沒頃刻萬變而幾不可辯矣然自明者觀之亦見其徒爾自勞而卒不足以欺人也但果老之書近見藏中印本却無此語疑是其徒已知此陋而陰削去之近得江西一後生書有兩語云曠目扼腕而指本心奮髯切齒而談端緒此亦其中其鄉學之病也

紫齋袁氏集序曰先生自始知學講求大道不得弗措久而

浸明又久而大明此心此理貫通融會美在其中不勞外索  
揭諸當世曰學問之要得其本心而已心之本真未嘗不善  
有不善者非其初然也孟子嘗言之矣向為身死而不受今  
為宮室之美妻妾之奉所識窮乏得我而為之此之謂失其  
本心其言昭晰如是而學者不能深信謂道為隱而不知其  
著謂道為邈而不知其近求之愈過道愈湮鬱至先生始大  
發之如指迷塗如藥久病迷者悟病者愈不越於日用之間  
而本心在是矣學者親承師訓向也跋望聖賢若千萬里之  
隔乃今知與我同本培之溉之皆足以敷榮茂遂豈不深可  
慶哉嗚呼先生之惠後學弘矣先生之言率由中出上而啓  
沃君心下而切磨同志又下而開曉黎庶及其他雜然著述  
皆此心也儒釋之所以分義利之所由別剖析至精如辨白

黑過俗學之橫流授天下於既溺吾道之統盟不在茲乎

林文軒集二十卷

工部侍郎林光朝撰後村劉氏序略曰以言語文字行世非  
先生意也先生乾淳間大儒國人師之朱文公於當世之學  
間有異同惟於先生加敬然先生學力既深下筆簡嚴高處  
逼檀弓穀梁平處猶與韓並驅在時片簡隻字人已貴重今  
其存者如岫嘯之碑岐陽之鼓矣先生歿六十年微言散軼  
復齋陳公其所序者僅十之二三外孫方之忝討求哀拾彙  
為二十卷勤於李漢趙德矣

施正憲集六十七卷 外集三卷

陳氏曰知樞密院廣信施師點聖與撰其在政府六年上眷  
未衰慨然勇退引去不可回識者壯其決趙南塘汝談其得

也為序其集而傳之

適齋類藁八卷

陳氏曰奉新袁去華宣卿撰紹興乙丑進士改官知石首縣而卒善為歌詞嘗賦長沙定王臺見稱於張安國為書之

梅溪集三十二卷 續集五卷

陳氏曰詹事樂清王十朋龜齡撰丁丑大魁立朝剛正劉瓛作序

劉氏集序略曰公始以諸生對策廷中一日數萬言被遇太上皇帝親擢冠多士取其言行之及佐諸侯入冊府事今上於初潛又皆以忠言直節有所裨補上亦雖敬信之登極之初即召以為侍御史納用其說公知上意以必復土疆必雪讎耻為已任其所言者莫非脩德行政任賢討軍之實而於

分別邪正之際尤致意焉平居無所嗜好顧喜為詩渾厚質直懇惻條暢如其為人不過為浮靡之文論事取極已意然其規模宏闊骨骼開張出入變化俊偉神速世之盡力於文字者往往反不能及其他片言半簡雖或出於脫口肆筆之餘亦無不以仁義忠孝為歸而皆出於肺腑之誠然非有所勉強慕嚮而為之也蓋其所稟於天者純乎陽德剛明之氣是以其心光明正大舒暢洞達無所隱蔽而見於事業文章一皆如此海內有志之士聞其名誦其言觀其行而得其心無不欽惟心服至於小人雖以一時趨向之殊或敢巧為諛詆然其極口不過以為迂闊近名不切時務至其大節之偉然者則不能有以毫髮點污也

酒隱集三卷

文獻卷一百四十一

正德書局

十一

陳氏曰宣州司理趙育去病撰其父鼎臣承之號竹隱畸士者也

四六類藁三十卷

陳氏曰起君郎建安熊克子復撰皆四六應用之文也亦無過人者克以王丞相李海薦驟用王時在樞府趙溫叔當國莫知其所從來頗疑其由徑沮之上意向之不能回也

拙菴雜著三十卷

陳氏曰工部侍郎東平趙璠老渭師撰門下侍郎野之姪以婦翁歐陽懋待制澤入仕從范石湖使虜震丞相并父亦薦之遂擢用知臨安坐殿司招兵事謫饒州

雙溪集二十卷

陳氏曰知郴州東陽曹冠宗臣撰由舍選登甲科坐為秦墳假手奪官再赴廷試得初品

止齋集五十二卷

陳氏曰中書舍人永嘉陳傅良君舉撰三山本五十卷  
水心葉氏墓誌曰初講城南茶院時諸老先生傳科舉舊學摩蕩鼓舞受教者無異辭公未三十心思挺出陳編宿說披剝潰敗奇意芽甲新語懋長士蘇醒起立駭未嘗有皆相號召雷動從之雖縻他師亦藉名陳氏由是其文擅於當世公不自喜悉謝去獨崇敬鄭景望薛士龍師交尊之入太學則張欽夫呂伯恭相視遇兄弟也公之從鄭薛也以克已兢畏為主敬德集義於張公盡心焉至古人經制三代治法又與薛公反復論之而呂公為言本朝文獻相承所以垂世立國者然後學之內外本末備矣公猶不已年經月緯晝驗夜索



文獻卷二百四十一  
陳氏曰丞相福公趙汝愚子直撰別本總為一集亦三十卷  
鴈湖李氏書後丞相餘干趙公秉正獲度即之凜然至形於篇  
章則思致清麗逸發雖古今能文辭者有不逮而世碩解知者  
非繇德業之巨器能之偉所以詞華見沒耶

龍川集四十卷外集四卷

陳氏曰永康陳亮全父撰少入太學嘗三上孝廟書召詣政事  
堂宰相無弘度迄報罷役以免舉為癸丑進士第一未祿而卒  
所上書論本朝治體本末源流一時諸賢未之及也亮才甚高  
而學馭其與朱晦庵往返書所謂金銀銅鐵混為一器者可見  
矣平生不能詩外集皆長短句極不工而自負以為經綸之意  
具在是尤不可曉也葉正則未遇時亮獨先識之後為集序及  
政皆含譏誚識者以為宜

水心葉氏集序曰同甫文字行於世者酌古論陳子課葉上皇  
帝三書最著者也子沆聚他作為若干卷以授予初天子得同  
甫所上書驚異累日以為絕出使執政召問當從何處下手將  
由布衣徑唯諾殿上以定大事何其盛也然而詆訛交起竟用  
空言羅織成罪再入大理獄幾死又何酷也使同甫晚不登進  
士第則世終以為狼疾人矣嗚呼悲夫同甫其果有罪於世乎  
天乎余知其無罪也同甫其果無罪於世乎世之好惡未有不  
以情者彼於同甫何獨異哉雖然同甫為德不為怨躬身而薄  
責人則疑若以為有罪焉可矣同甫既脩皇帝王霸之學上下  
二千餘年考其合散發其秘藏見聖賢之精微常流行於事物  
儒者失其指故不足以開物成務其說皆今人所未講朱公元  
晦意有不與而不能奪也呂公伯恭退居金華同甫間往視之

極論至夜呂公嘆曰未可以世為不能用虎帥以聽誰敢犯子同甫亦頗慰意焉余最鄙且鈍同甫微言十不能解一二獨以為可教者病耗十年耗亡盡矣今其遺文大抵班班具焉覽者詳之而已

軒山集十卷

陳氏曰樞密使獻肅公濡須王蘭謙仲撰淳熙乙未駕幸太學蘭為武學諭在班列中人物偉然上一見奇之自是擢用不由邑寢徑為祭官馴至執政其在經惟論官僚攀附而登輔佐者挾數用術道諛濟私陳義凜然嘉定以示其子孫不敢求仕亦不敢請謚至端平乃得謚

合齋集十六卷

陳氏曰秘書少監永嘉王柎木叔撰乾道丙戌進士在永嘉諸老最為先登其容貌偉然襟韻灑然雖不以文自鳴而諸老皆推敬之

乘山集四十卷

陳氏曰端明殿學士劔門黃裳文叔撰在嘉邸最久備盡忠益甲寅御極未及大用病不能朝士論惜之

政愧集一百二十卷

陳氏曰參政四明樓鑰大防撰隆興癸未省試考作賦魁以犯諱當黜知舉洪文安遵奏收實末甲首

西山真氏集序曰公之文如三辰五星森麗天漢昭昭乎其可觀而不可窮如泰華喬嶽蓄泄雲雨巖巖乎莫測其顛際如九江百川波瀾蕩瀟淵淵乎不見其涯涘人徒見其英華發外之盛而不知其本有在也公生於故家接中朝文獻博極群書識



古文奇字文備衆體非他人窳狹僻澁以一長名家而又發之以忠孝本之以仁義其大典冊大議論則世道之消長學術之廢興善類之離合繫焉方淳紹間鴻碩滿朝每一奏篇出其援據該洽義理條達者一詔令下其詞氣雄渾筆力雅健者學士大夫讀之必曰樓公之文也於乎所謂有本者如是非耶

齊齋甲藁二十卷乙藁十五卷翰林前藁二十卷後藁二卷掖垣草二十卷兼山論著三十卷附錄五卷年譜一卷

陳氏曰禮部尚書歸安倪思正父撰丙戌進士戊戌宏詞受知阜陵早登禁直紹興間遂位法從立朝綱介不苟合慶元嘉定屢召屢出嘗言與其為有瑕執政寧為無瑕從官由是名重天下端平初詔以先朝遺直得謚文節

靜安作具十四卷別集十卷

陳氏曰清江徐得之思叔撰與其子筠孟堅同甲辰進士次子天麟仲祥亦乙丑甲科其家長於史學

晦巖集十二卷

陳氏曰祕書丞鹽官沈清臣正卿撰嘗為國子錄有薦於朝欲得召試執政有發笑者曰安有張子蓋女婿而可為館職者乎遂罷欲為奇節以蓋之會王希呂為諫官上書力言其不可孝宗大怒時相虞允文惡沈介下清臣大理風使引介不從謫封州晚乃召用勸孝宗力行三年喪為翊善嘉邸以直諒稱初從張無垢學後居雪川自嶺南歸開門受徒動以聖賢自命效禪門入室規式與其徒問答下語不契輒使再參頗為人所譏

定齋集四十卷

陳氏曰寶謨閣直學士蔡戡定夫撰君謨四世孫丙戌甲科

小山雜著八卷

陳氏曰知樞密院龍泉何澹自然撰

東江集十卷

陳氏曰丞相臨海謝深甫子肅撰

慈溪甲藁二十卷

陳氏曰寶謨閣直學士慈溪楊簡敬仲撰

鈍齋集六十卷

陳氏曰著作郎楊濟濟道撰淳熙五年進士京鏜帥蜀上已出  
遨齊為樂語首云三月三日豈無水邊麗人一觴一詠亦有山  
陰襖事又云良辰美景賞心樂事四者難并崇山峻嶺脩竹茂  
林群賢畢至一時傳誦京為相召入館權郎出知果州以終  
周氏山房集二十卷後集二十卷

陳氏曰祕書省正字吳郡周南仲撰南有聲學校夷成登甲  
科而仕不偶再入館再罷以殿廷所授文林郎終焉

水心葉氏墓誌曰君耽書喜誦出於天性十五六時視吳下問  
學止科舉心陋之一徃旬日已棄去歲五易師一易師為傾動  
相播告擯絕既從余初若無所論質已而耳改目化氣竦神涌  
古今事物錯落高下不以涯量頓悟捷得受之若驚行之若疑  
標樹山嶽之上越軼風霆之外故明昔類望塵不及皆靡弛而  
逝矣常以世道興廢為己重負一飯不顧私憂時如家憂人如  
身人情多玩忽見事君悻心但慮親緩知亟老校小史引坐深  
語所知徃徃非人所能知也文詞撥去今作脫換騷雅欲以力  
自成家而環羅精切達於特用亦非人所及也端行拱立尺寸  
程準門內順穆廉節整飭自賜第授文林郎終身不進官兩為

館職數月止既絕意屏坐衣食弊惡雞鳴挾書盡夜分皆憶念  
上口數千載未了事皆欲正定名章偉著皆欲銓品異聞逸傳  
皆欲論述曰此所以遺吾老俟吾死也

平庵悔藁十五卷後編六卷

陳氏曰太府卿松陽項安世平父撰悔藁者以語言得罪悔不  
復為也自序當慶元丙辰後編自丁巳至壬戌

自序項子題所為文藁曰滑稽篇客曰是所謂文似相如始類  
俳之意非耶曰非也世之人無貴賤皆畏人笑獨滑稽者不畏  
人笑非獨不畏且甚欲之九其貌服言動皆欲得人之笑人小  
笑之則小極大笑之則大慙人不笑之則大愧若予之為文亦  
若是耳人之笑予之藥也人小笑之則予亡其小病矣人大笑  
之則予亡其大病矣人不笑之則予之病其危哉是與滑稽之

技無以異也客聞其說觀其文大笑冠帶盡脫項子赧然汗下  
矍然神醒曰予病瘳矣再拜謝客書以為序

東平集二十七卷

陳氏曰鞏豐仲至撰淳熙甲辰進士

水心墓誌畧曰時新迪義理之學草茅士震於見聞多矜露怵  
怵至他文史言論儒之藝業又昧陋顛倒莫知幅程獨仲至抑  
縱開闔條流品彙應變不迫富若素有余本拙疎不能自達而  
仲至廣導曲引出幽入耿蓋為之黽勉追逐於荒原斷澗之側  
數年仲至日益有名不幸不得用然有以自負命雲侶月跨越  
汗漫浩乎不可挽而余畏懼怯劣常痼留一榻不敢越戶限然  
後知人之稟分高下絕殊固非切磋誘掖所能增長矣仲至學  
敏而早成自童州時前輩源緒古今音節事之因革總統如注

水千文之壑迫前隨後宿艾駭服以為積十數年燈火勤力聚數十家師友講明猶不能到也其文無險怪華巧而以理屈人片詞半牘皆清朗得言外趣尤工為詩多至三千餘首

三松集十八卷

陳氏曰廬陵王子俊才臣撰周益公揚誠齋客以列薦補官入蜀為成都帥幕

橫堂小集十卷

陳氏曰右司郎中福清林桶子長撰

潔齋集二十六卷後集十二卷

陳氏曰禮部侍郎四明袁燮和叔撰

北山集略十卷

陳氏曰直龍圖閣三山陳孔碩膚仲撰全集未傳

育德堂外制集八卷內制集三卷

陳氏曰兵部尚書永嘉蔡幼學行之撰成童穎異從同郡陳傳良君舉學治春秋年十七試補上庠首選陳反出其下明年陳改用賦冠監舉而幼學經魁又明年省闈先多士而陳傳良亦為賦魁一時師弟子雄視場屋莫不歆羨

水心葉氏墓誌曰公雖幼以文顯無浮巧輕艷之作既長益務闡教化養性情花卉之炫麗風露之凄爽不迫也詞命最溫厚亦不自矜貴惟於國史研貫專一朱墨義類刊闕齊整各就書法為續司馬公卿百官表年曆大事記備志辨疑編年政要列傳舉要等百餘篇今代之完書也天資疑童危坐竟日或不通一詞龍窻陳同甫言吾嘗與陳君舉極論往往擊柝案聲撼林木行之在旁貌若無聞吾頗訥之衆亦云素無短長於間也一

日夜盡散忽語吾道一爾矣皇帝王霸之云吾方辨數而行之  
橫啓縱闔援今證古釐為十百聚為一二抵夜接日若懸江河  
吾謝不能乃已則復寡言默默如故故雖並舍連榻不知也然  
則昔人謂得人肩睫定士於俄頃亦豈盡然歟蓋公之中深隱  
厚可驗於是矣

止安集十八卷

陳氏曰太府寺丞三山陳振震亨撰

西山集五十六卷

陳氏曰參政浦城真德秀希元撰

正齋集三十二卷

陳氏曰翰林學士於潛洪咨夔舜俞撰

退庵集十五卷

陳氏曰提轄文思院龍泉陳炳撰

梅軒集十二卷

陳氏曰奉化丞山陰諸葛興仁叟撰

道思遺藁六卷事監韻語三卷

陳氏曰永康呂皓子陽撰道思其庵名後溪劉光祖德脩為作  
記當淳熙中投匭救父兄之難朝奏上文報可一時非辜盡得  
清脫其書辭甚偉然非孝廟聖明安能照覆盆之下哉

劉汝一進卷十卷

陳氏曰諫議大夫吳興劉度汝一撰度嘗應大科此其所業也

策曰傳言論曰鑑古各二十五篇

唯室兩漢論一卷

陳氏曰吳郡陳長方齊之撰紹興八年進士

文獻卷一百四十一  
鼎論三卷時議一卷

陳氏曰三山何萬一之撰隆興元年進士仕為都司知漳州治述十卷

陳氏曰從政郎鄭湜紹興元年撰進按丙戌榜有三山鄭湜溥之是年已為祕書郎面對劄子剴切通練于今傳誦比當別是一鄭湜耶

廬山雜著一卷

陳氏曰知南康軍錢聞詩撰

閑靜治本論五卷將論五卷

陳氏曰知樞密院廣陵張巖肖翁撰

林網山集

福清林亦之學可撰後村劉氏序略曰余嘗評艾軒高處逼檀弓穀梁平處猶與韓並驅他人極力摹擬不見其峻潔而古奧者惟見其寂寥而狹短者縱使通真或可亂真猶虎賁之似蔡邕也至於網山論著句句字字足以明周公之志得少林之髓矣其律詩高妙者絕類唐人疑老師當避其鋒他文稱是

陳樂軒集

福清陳藻元繁撰後村劉氏序略曰樂軒七十五乃死年出於其師而窮尤甚於其師城中無片瓦倚居福清縣之橫塘開門授徒不足自給至浮游江湖崎嶇嶺海積蝕得百千歸買田數畝輒為人奪去士之窮無過於此矣今讀其文講學明理浩乎自得不及汲於希世求合螢牕雪案猶宗廟百官也菜羹脫粟猶堂食蒿錢也入則課妻子耕織勤生務本有拾穗之歌焉出則與諸生弦誦登山臨水有舞雩之詠焉自昔遺佚阨窮之士

功名頓挫時命齟齬往往有感時觸筆之作以洩其無慘不平之鳴若虞卿之愁韓非之憤墨翟之悲梁鴻之噫唐衢之哭是已樂軒平生可愁可憤可悲可噫可哭之時多矣而以樂自扁樂之為義在孔門惟許顏子先儒教人必令求顏氏之所樂嗚呼此固樂軒之所聞於二師歟樂軒沒二十餘年余從竹溪林侯肅翁傳抄遺藁姑叙其平生大致如此肅翁又樂軒之高弟也他日居魏文貞之地秉陳叔達之筆當為河汾先生立傳無使天下後世有遺恨云

李易安集十二卷

晁氏曰李捨非之女幼有才藻名先嫁趙誠之其舅正夫相徽宗朝李氏嘗獻詩曰炙手可熱心可寒然無檢操後適張汝舟不終晚節流落江湖間以卒

閨秀集二卷

陳氏曰建安徐氏撰徐林稗山之從姑祥符勅頭頭之姪孫女嫁括蒼祝璣璣為部使者有子曰求之嘗知滁川

洪覺範筠溪集十卷

晁氏曰僧惠洪覺範姓喻氏高安人少孤能緝文張天覺聞其名請住峽州天寧寺以為今世融肇也未幾坐累民之及天覺當國復度為僧易名德洪數延入府中及天覺去位制獄窮治其傳達言語於郭大信竄海南島上後北歸建炎中卒著書數萬言如林間錄僧寶傳冷齋夜話之類皆行於世然多夸誕人莫之信云

石門文宗禪三十卷

陳氏曰洪覺範撰其在釋門得法於真淨克文而於士大夫則

與黨人皆厚善誦習其文得罪不悔為張商英陳瓘鄒浩尤盡力其文俊偉不類浮屠語韓駒子蒼為塔銘云爾

饒德操集一卷

晁氏曰饒節字德操曾布之客也性剛峻晚與布論不合因棄去祝髮為浮屠在襄漢間聲望甚重云

陳氏曰節為僧號如璧其詩名倚松集二卷

文獻通考卷之二百四十一

文獻通考卷之二百四十二

鄱陽 馬 端臨 貴與 著

經籍考

集詩集

陳氏曰九無他文而獨有詩及雖有他文而詩集復獨行者別為一類

阮步兵集

陳氏曰魏步兵校尉陳留阮籍嗣宗撰其題皆曰詠懷首卷四言十三篇餘皆五言八十篇通為九十三篇文選所收十七篇而已

宋武帝集一卷

陳氏曰孝武駿也



梁簡文集五卷

陳氏曰簡文帝綱也按隋志八十五卷唐已缺五卷中興書目只存一卷詩百篇又缺其三首今五卷皆詩總為二百四十四篇

梁元帝詩一卷

陳氏曰即湘東王繹

謝惠連集一卷

陳氏曰宋司徒參軍謝惠連撰本集五卷今惟詩二十四首惠連得名早輕薄多尤累故仕不顯死時才三十七歲

劉孝綽集一卷

陳氏曰梁秘書監彭城劉孝綽撰宋僕射勔之孫本傳稱文集數十萬言今所存上此又言兄弟及群從子弟當時有七十人

並能屬文近古未有其三妹亦並有才學適徐悌者文尤清遠所謂劉三娘者今玉臺集中有悌妻詩

柳吳興集一卷

陳氏曰梁吳興太守河東柳惲文暢撰僅有十八首

徐孝穆集一卷

陳氏曰陳太子太傅東海徐陵孝穆撰本傳稱其文喪亂散失存者二十卷今惟詩五十餘篇

江總集一卷

陳氏曰陳尚書令考城江總總持撰總在陳為太子詹事以宮端為長夜之飲及總主即位當權任日為艷詩君臣昏亂以至亡國入隋為上開府唐志集三十卷中興書目七卷今惟存詩僅百首云

陰鏗集一卷

陳氏曰陳散騎常侍南平陰鏗子堅撰才三十餘篇杜子美云李侯有佳句往往似陰鏗今考之未見鏗之所以似太白者太白固未易似也子美云爾殆必有說

薛道衡集一卷

陳氏曰隋內史侍郎河東薛道衡元卿撰詩凡十九篇本集三十卷所存止此大抵隋以前文集存全者亡幾多好事者於類書中抄出以備家數也

史言道衡每至構文必隱空齋蹋壁而卧聞戶外人聲便怒其沉思如此

杜必簡集一卷

陳氏曰唐著作郎襄陽杜審言必簡撰工部之祖也唐初流宋以來律詩始盛行然未以平仄失眼為忌審言詩雖不多句律極嚴無一失粘者甫之家傳有自來矣然遂欲衙官屈宋則不可也

揚誠齋序畧曰必簡嘗為吉州司戶今戶曹趙君去清旁搜遠撫得其詩四十二首將刻棗以傳好詩且以為戶廳之寶玉大弓屬予集之余觀必簡之詩若牽絲紫蔓長即水符牽風翠帶長之句也若鶴子曳童衣即儒衣山鳥怪之句也若雲陰送晚雷即雷聲忽送千峯雨之句也若風光新柳報宴賞落花催即星霜玄鳥變身世白駒催之句也予不知祖孫之相似其有意乎抑亦偶然乎至如往來花不發新舊雪仍殘如日氣抱殘虹如愁思看春不當春明年春色倍還人如飛花攪獨愁皆佳句也三世之後莫之與京宜哉

薛少保集一卷

陳氏曰唐太子少保河東薛稷嗣通撰稷道衡曾孫魏徵外孫喬知之集一卷

陳氏曰唐右司郎喬知之撰天授中為酷吏所陷死集中有綠珠怨蓋其所由以致禍也

孟襄陽集三卷

陳氏曰唐進士孟浩然撰宜城王士源序之凡二百十八首分為七類太常卿韋縉為之重序

東坡謂浩然詩韻高而才短如造內法酒手而無材料耶

崔顥集一卷

陳氏曰唐司勳員外郎崔顥撰開元十年進士才俊無行黃鶴樓詩盛傳于世

祖詠集一卷

陳氏曰唐祖詠撰開元十二年進士

崔國輔集一卷

陳氏曰唐集賢直學士禮部員外郎崔國輔撰開元十三年進士應縣令舉為許昌令天寶中加學士後以王鉷近親坐貶詩凡二十八首臨海李氏本後又得石林葉氏本多六首

綦毋潛集一卷

陳氏曰唐待制集賢院南康綦毋潛孝通撰南康今贛州

儲光義集五卷

陳氏曰唐監察御史魯國儲光義撰與崔國輔綦毋潛皆同年進士天寶末任偽官貶死顧况為集序

常建集一卷

常建集一卷

陳氏曰唐盱眙尉常建撰

王江寧集一卷

陳氏曰唐龍標尉江寧王昌齡伯才撰與常建俱開元十四年進士二十二年選宏詞超絕群類為汜水尉不護細行貶龍標世亂還里為刺史閭丘曉所殺為詩緒密而思清

李頎集一卷

陳氏曰唐李頎撰開元二十三年進士

崔曙集一卷

陳氏曰唐崔曙撰開元二十六年進士狀頭

杜工部詩集註三十六卷

陳氏曰蜀人郭知達所集九家注世有稱東坡杜詩故事者隨事造文一一牽合而皆不言其所自出且其辭氣首末出一口

蓋妄人依托以欺亂流俗者書坊輒勑入集註中殊敗人意此本獨削去之福清曾噩子肅刻板五羊漕司字大宜老竄為善本

宋子京贊唐興詩人承陳隋風流浮藻相矜至宋之間沈佺期等研揣聲音浮切不差而號律詩競相沿襲逮開元間稍裁以雅正然侍筆者質反好麗者壯達人得一槩皆自名所長至甫渾涵汪洋千彙萬狀兼古今而有之他人不足甫乃厭餘殘膏賸發沾丐後人多矣故元稹謂詩人以來未有如子美者甫又善陳時事律切精深至千言不少衰世號詩史昌黎韓愈於文章少許可至歌詩獨推曰李杜文章在光燭萬丈長誠可信云朱子語錄曰杜詩初年甚精細晚年橫逸不可當只意到處便押一箇韻如自秦州入蜀諸詩分明如畫乃其少作也人多說

杜子美夔州詩好此不可曉夔州詩却說得鄭重煩絮不如他  
中前有一節詩好魯直一時固有所見今人只見魯直說好便  
却說好如矮人看場耳杜詩最多誤字蔡宗正異因好而未盡  
其嘗欲賚之作杜詩攷異竟未暇也如風吹蒼江樹雨洒石壁  
來樹字無意思當作去字無疑去字對來字又如蜀有漏天以  
其西北陰盛常雨如天之漏也故杜詩云鼓角漏天東後人不  
曉其義遂改漏字為滿字似此類極多

門類杜詩二十五卷

陳氏曰補東萊徐宅居仁編次未詳何人

類集詩史三十卷

陳氏曰莆陽方醇道溫叟編

王季友集一卷

陳氏曰唐王季友撰元結篋中集有季友詩二首今此集有七  
篇而篋中二首不在焉杜詩所謂鄴城客子王季友者意即其  
人也耶

陶翰集一卷

陳氏曰唐禮部員外郎丹陽陶翰撰開元十八年進士次年宏

詞

秦隱君集一卷

陳氏曰唐處士秦系公緒撰自天寶間有詩名藩鎮奏辟皆不  
就嘗隱越之剡泉之南安至貞元中年八十餘不知所終此本  
南安所刻余嘗於宋次道寶刻叢章得其逸詩二首書冊末

岑嘉州集八卷

陳氏曰唐嘉州刺史南陽岑參撰文本之曾孫天寶二載進士

為補闕左史郎官與杜甫唱和

李嘉祐集一卷

陳氏曰唐台州刺史李嘉祐從一撰天寶七載進士亦號臺閣集李肇稱其水田飛白鷺夏木轉黃鸝之句王維取之以為七言今按此集無之

右謝惠連陰鏗杜審言儲光羲王昌齡常建孟浩然岑參李嘉祐九家集晁氏書錄在別集門所論已附在本門此更不重具

皇甫冉集一卷

晁氏曰唐皇甫冉茂政丹陽人天寶十五年進士為無錫尉歷拾遺補闕卒與弟曾齊名當時比張氏景陽孟陽云集有獨孤及序

皇甫曾集一卷

陳氏曰唐侍御史皇甫曾孝常撰天寶十二載進士兄冊後曾三載登第

郎士元詩一卷

晁氏曰唐郎士元字君胄中山人天寶十五載進士為郢州刺史與錢起俱有詩名而士元尤更清雅時朝廷公卿出牧奉使若兩人無詩祖行人以為愧

包何集一卷

陳氏曰唐起居舍人延陵包何幼正撰

包佶集一卷

唐史藝文志何佶皆包融之子兄弟齊名世稱二包融與儲光羲皆延陵人曲阿有餘杭尉丁仙芝緱氏主簿蔡隱立監察御

史蔡希周渭南尉蔡希寂處士張彥惟張湘校書郎張暈吏部  
常選周瑀長洲尉談戡句容有王府參軍殷選硤石主簿樊光  
橫陽主簿沈如筠江寧有右拾遺孫處文處士徐延壽丹徒有  
江都主簿馬挺武進尉申堂構十八人皆有詩名殷蟠彙次其  
詩為丹陽集者

陳氏曰唐秘書監包佶選天寶六載進士兄何後一年  
錢考功集二卷

晁氏曰唐錢起微之父吳郡人天寶中舉進士初從鄉薦客舍  
月夜聞人哦於庭曰曲終人不見江上數峯青起攝衣從之無  
所見矣及就試詩題乃湘靈鼓瑟也起即以鬼謠十字為落句  
主文李暉深嘉之擢至高第釋褐授校書郎終考功與郎士元  
齊名時曰前有沈宋後有錢郎

陳氏曰蜀本作前後集十三卷

韓翃集五卷

晁氏曰唐韓翃君平南陽人天寶十三載進士淄青侯希逸宣  
武李勉繼辟幕府俄以駕部郎中知制誥終於中書舍人翃詩  
興致繁富朝野重之

陳氏曰翃以春城飛花之句受知德宗

顧况集二十卷

晁氏曰唐顧况字逋翁蘇州人至德二年江東進士善為歌詩  
性諧談德宗時柳渾輔政以秘書郎召况善李泌及泌相自謂  
當得達官久遷著作郎及泌卒有調笑語貶饒州司戶卒集有  
皇甫湜序

陳氏曰湜嘗言吾自為顧况作序未嘗許他人况在唐蓋為人

推重也集本十五卷今止五卷不全

嚴維集一卷

陳氏曰唐祕書郎山陰嚴維正文撰至德二載辭藻宏麗科

耿漳集一卷

陳氏曰唐右拾遺河東耿漳撰寶應二年進士登科記一作緯

韋蘇州集十卷

陳氏曰唐韋應物京兆人天寶時為三衛後作洛陽丞京兆府功曹知滁江二州召還或媚其進媒孽之出為蘇州刺史詩律自沈宋以後日益靡嫚鏗章刻句揣合浮切雖音韻諧婉屬對麗密而閑雅平淡之氣不存矣獨應物之詩馳驟建安以還得其風格云

韓子蒼曰蘇州少以三衛郎事玄宗豪縱不羈玄宗崩始折節

務讀書故其逢揚開府詩曰少事武皇帝無賴侍恩私身作里中橫家藏亡命兒朝持擣蒲局暮竊東鄰姬司隸不敢捕立在白玉墀一字都不識飲酒肆頑癡云然余觀其人為性高潔鮮食寡欲所居掃地焚香而坐與豪縱者不類其詩清深妙麗雖唐詩人之盛亦少其比又豈似晚節把筆學為者豈蘇州有序之過歟

徐師川云韋蘇州詩人多言其古淡乃是不知言自李杜以後古人詩法盡廢惟蘇州有六朝風致最為流麗

司空文明集三卷

陳氏曰唐虞部郎中京兆司空曙文明撰別本一卷才數篇

李端司馬集三卷

晁氏曰唐李端趙州人六曆五年進士為校書郎卒官杭州司



馬郭駿尚昇平公主賢明招納士類故端等皆客之端坐上賦詩奇甚主大加稱歎錢起曰素為之請賦起姓端立獻一篇云  
新開金埒看調馬舊賜銅山許鑄錢起乃服主喜厚賜之

盧綸詩一卷

晁氏曰唐盧綸與韋辛韓翃錢起司空曙苗發崔烟耿緯夏侯審李端皆能詩齊名號大曆十才子綸字允言累舉進士不第

李益詩一卷

晁氏曰唐李益君虞姑臧人大曆四年進士調鄭縣尉幽州劉濟辟從事憲宗雅聞其名召為集賢殿學士負才凌籍士眾不能堪暴其獻濟詩不上望京樓之句以涉怨望詔降秩俄復舊益少負詞藻長於歌詩與宗人賀齊名每作一篇樂工以賂求取被聲歌供奉天子征入早行詩天下皆施之圖畫今集有從軍詩五十首而無此詩惜其放逸多矣

陳氏曰益宰相揆之族子舊史本傳指其少有癡疾防閑妻妾過於苛酷有散灰扇戶之談聞於時故時謂之妬癡為李益疾按世傳霍小玉傳所謂李十郎詩開簾風動竹疑是故人來者即益也舊史所載如此豈小玉將死訣絕之言果驗耶抑好事者因其有此疾遂為此說以實之也

孟東野詩集十卷

晁氏曰唐孟郊東野湖州人貞元十二年進士調溧陽尉辟為興元參謀卒郊以隱嵩山性介寡合韓愈一見為忘形交為詩有理致然思苦澁李觀論其詩曰高處在古無上平處下顧二謝云張籍謚為貞曜先生集宋次道重編先時世傳汴吳鏤本五卷一百二十四篇周安惠本十卷二百三十一篇別本五卷

三百四十篇蜀人卷濬用退之贈郊句纂成池集二卷一百八十篇自餘不為編秩雜錄之家家自異次道總拾遺逸摘去重復若體制不類者得五百十一篇四十聯句不與焉一贊二書附于後郊集於是始有完書

穎濱蘇氏曰唐人工於為詩而陋於聞道孟郊嘗有詩曰食齋腸亦苦強歌聲無歡出門如有礙誰云天地寬郊耿介之士雖天地之大無以安其身起居飲食有感感之憂是以卒窮以死而李觀盛稱之至韓退之亦談不容口甚矣唐人之不聞道也孔子稱顏子在陋巷入不堪其憂回也不改其樂與郊異矣

朱傲詩一卷

晁氏曰唐朱傲字長通襄陽人隱居剡溪嗣曹王臯鎮江西辟節度參謀貞元初召為拾遺不就

朱灣集一卷

陳氏曰唐永平從事朱灣撰自號滄洲其為從事李勉辟之也

麴信陵集一卷

晁氏曰唐麴信陵貞元元年進士為舒州望江令以率長孫佐輔集一卷

陳氏曰唐長孫佐輔撰按百家詩選云德宗時人其弟公輔為吉州刺史往依焉當必有所據也其詩號古調集

柳宗元詩一卷

陳氏曰唐柳宗元撰子厚詩在唐與王摩詰韋應物相上下頗有陶謝風氣古律絕句總一百四十五篇在全集中不便於觀覽因抄出別行

東坡曰蘇李之天成曹劉之自得陶謝之超然固已至矣而杜

子美李太白以英偉絕世之資凌跨百代之詩人盡廢然魏晉以來高風絕塵亦少衰矣李杜之後詩人繼出雖有遠韻而才不逮意獨韋應物柳子厚發纖穠於簡古寄至味於淡泊非餘子所及也唐末司空圖崎嶇兵亂之間而得詩人高雅獨有承平之遺風其論詩曰梅止於酸鹽止於醎飲食不可無鹽梅而其美常在於醎酸之外可以一唱而三嘆也子厚詩在陶淵明下韋蘇州上退之豪放奇險則過之而溫麗靖深不及也所貴於枯淡者謂外枯而內膏似淡而實美淵明子厚之流是也若中邊皆枯亦何足道佛言譬如食蜜中邊皆甜人食五味知其甘苦者皆是能分別其中邊者百無一也

後村劉氏曰柳子厚才高他文惟韓可對壘古律詩精妙韓不及也當舉世為元和體韓猶未免諧俗而子厚獨能為一家之言豈非豪傑之士乎昔何文績嘗語李漢老云如子厚詩人豈可不學他做數百首漢老退而嘆曰得一二首似之足矣文績後從北狩病中詩云歷歷通前劫依依返舊魂人生會有死遺恨滿乾坤雖意極忠憤而語不刻急亦學柳之驗

張籍詩集五卷

晁氏曰唐張籍文昌和州人貞元十五年登進士第終國子司業籍性狷急為詩長於樂府多警句元和中和與白樂天孟東野歌詞天下宗之謂之元和體一本絕三卷陳氏曰張洎所編錢公輔名木鐸集與他本相出入亦有他本所無者凡十二卷近世湯中季庸以諸本校定為張司業集八卷且考訂其為吳郡人魏峻叔高刻之平江續又得木鐸集九他本所無者皆附其末

王建集十卷

陳氏曰唐陝州司馬王建仲和撰建長於樂府與張籍相上下大曆十年進士歷官昭應縣丞大和中為陝州司馬尤長宮詞在集中第十卷錄出別行

漁隱叢話余閱王建宮詞選其佳者亦自少得只世所膾炙者數詞而已其間雜以他人之詞如閑吹玉殿昭華管醉折黎園縹蒂花十年一夢歸人世絳縷猶封繫臂紗銀燭秋光冷畫屏輕羅小扇撲流螢天階夜色涼如水卧看牽牛織女星並杜牧之也淚滿羅中夢不成夜深前殿按歌詩紅顏未老恩先斷斜倚薰籠坐到明此白樂天也寶仗平明金殿開暫將絢扇共徘徊玉顏不及寒鴉色猶帶昭陽日影來此王昌齡也建詞凡百有四篇又逸詞九篇或云元微之亦有詞雜於其間余以元氏

長慶集檢尋却無之或者之言誤矣

舊跋王建大和中為陝州司馬與韓愈張籍同時而籍相交善工為樂府歌行思遠格幽初為渭南尉與宦者王守澄有宗人之分因過飲相譏戲守澄深憾曰吾弟所作宮詞禁掖深邃何以知之將奏劾建因以詩解之曰先朝行坐鎮相隨今上春宮見長時脫下御衣偏得着進來龍馬每教騎嘗承密旨還家少獨奏邊情出殿遲不是當家頻向說九重爭遣外人知事遂寢宮詞凡百絕天下傳播例此體者雖有數家而建為之祖也

李長吉集四卷外集一卷

兪氏曰唐李賀長吉鄭王之孫七歲能詞章韓愈皇甫湜聞之過其家使賦詩援筆輒就自目曰高軒過二人大驚年二十七終協律郎賀詞尚奇詭為詩未始先立題所得皆警邁遠去筆

墨畦逕當時無能働者樂府十數篇雲韶工合之絃管云或說  
賀卒後不相悅者盡取其所著投匱中以故世傳者不多外集  
予得之梁子美家姚鉉頗選載文粹中

宋景文諸公在館嘗評唐人詩云太白仙才長吉鬼才然長吉  
有鴈門太守詩曰黑雲壓城城欲摧甲光向日金鱗開王安石  
曰是兒言不相副也方黑雲如此安得向日之甲光也

朱子語錄曰李賀詩巧然較怪不如太白自在

後村劉氏曰樂府惟李賀最工張籍王建輩皆出其下然全集  
不過一小冊世傳賀中表有妬賀才名投其集溷中故傳於世  
者極少余竊意不然天地間尤物且不多得况佳句乎使賀集  
不遭厄必不能一一如今所傳本之精善疑賀手自鈐擇者耳

### 盧仝集一卷

晁氏曰唐盧仝范陽人隱少室山號玉川子徵諫議不起唐史  
稱韓愈為河南令愛其詩厚禮之嘗作月蝕詩以譏元和逆黨  
愈稱其工按其詩云元和庚寅蓋五年也憲宗遇弒在十五年  
後十歲也豈追托庚寅歲事為詩乎不然則史証也後死于甘  
露之禍

陳氏曰凡三卷其詩古怪而女兒曲少婦吟有所思諸篇輒嫵  
媚豔冶其第三卷號集外詩九十首慶曆中有韓盈者為之序  
川本止前二卷

### 劉義詩一卷

晁氏曰唐劉義少嘗任俠殺人後更折節讀書善歌詩客韓愈  
門作冰柱雪車二詩出盧仝李賀右歸齊魯不知所終今集二  
十餘篇不載二詩

陳氏曰九二卷又附見新史韓愈傳不知何處人其冰柱雪車二詩狂怪誠出盧仝右然豈風人之謂哉

楊巨源詩一卷

晁氏曰唐楊巨源字景山河中人貞元五年第進士為張弘靖從事自秘書郎擢太常博士遷禮部員外郎出為鳳翔少尹復召除國子司業巨元在元和中詩韻不造新語體律務實用功頗深旦暮搔首微歎不輟年老成疾嘗贈弘靖詩叙其世家云伊世無聞祖韋賢不到孫時人稱之年滿七十丐歸時宰惜其去以為其鄉少尹不絕其祿太和以官壽卒

陳氏曰九五卷按韓退之有送楊少尹序蓋自司業為少尹稱其都少尹者乃其鄉里也藝文志乃云太和河中小尹誤第三卷末二十餘篇有目無詩

武元衡臨淮集兩卷

晁氏曰唐武元衡伯蒼河南人建中四年進士元和二年以門下侍郎平章事出為劔南節度八年復秉政明年早朝遇盜害之元衡工五言詩好事者傳之被於管絃嘗夏夜作詩曰夜久喧暫息池臺惟月明無因駐清景日出事還生翼日遇害舊有臨淮集七卷此其二也議者謂唐世工詩宦達者唯高適宦達詩工者唯元衡

陳氏曰初用蕭田李氏本傳錄後以石林氏本校益六首及李吉甫唱酬六首川本作二卷

張碧歌詩集一卷

陳氏曰唐張碧太碧撰藝文志云貞元時人集中有覽貫休上人詩或勸入之也

陳羽集一卷

陳氏曰唐東宮衛佐陳羽撰貞元八年陸贄下第二人

羊士鸚詩一卷

晁氏曰唐羊士鸚貞元元年進士第順宗時為宣歙巡官王叔文所惡貶汀州寧化尉元和初李吉甫知獎擢監察御史掌制誥嘗出為資州刺史

陳氏曰賈群引士鸚為御史共傾李吉甫

鮑溶詩五卷

晁氏曰唐鮑溶字德源元和四年進士集中有別韓博士愈詩云不知無聲淚中感一顧厚蓋退之所嘗推激也張薦謂溶詩氣力宏贍博識清度雅正高古衆才無不備具曾子固亦愛其詩以史館本及歐公所藏互校得二百三十三篇今本有一百

九十二篇餘逸

南豐曾氏曰鮑溶詩集六卷史館書舊題云鮑方集五卷崇文總目叙別集亦然知制誥宋敏求為臣言此集詩見文粹唐詩類選者皆得鮑溶作又防之雜感詩最顯而此集無之知此詩非防作也臣以文粹類選及防雜感詩考之敏求言皆是又得參知政事歐陽脩所藏鮑溶集與此集同然後知為溶集也史館書五卷總二百篇歐陽氏書無卷第總百餘篇然其三十篇史館書所無今別為一卷附於後而總題曰鮑溶詩集六卷蓋自先王之澤熄而詩亡晚周以來作者嗜文辭抒情思而已然亦往往有可采者溶詩尤精約謹嚴而達理者少亦近世之能言者也故既正其誤謬且著其大旨以傳焉

寶拾遺集一卷

寶拾遺集一卷

寶拾遺集一卷

寶拾遺集一卷

陳氏曰唐左拾遺扶風竇叔向撰包何為序群庠年輩皆其子也

賈長江集十卷

晁氏曰唐賈長浪仙詩共三百七十九首唐書稱為范陽人初為浮屠名無本後從韓愈遂去浮屠舉進士累舉進士不第文宗時坐飛謗謫長江主簿會昌初終普州司倉參軍今長江祠堂中有石刻大中九年墨制大中宣宗年號與傳不合據言又載武帝時謫去尤差誤

陳氏曰韓退之有送無本詩即其人也後返初舉進士不第文宗時坐飛謗貶長江會昌初以普州參軍卒本傳所載如此今遂寧刊本首載大中墨制云此者禮部奏卿風狂遂且養疾關外今却携卷軸潛至京城遇朕微行聞卿諷詠觀其志業可謂屈人是用顯我特息賜卿墨制宜從短簿別俟殊科與傳所稱飛謗不同蓋宣宗好微行小說載島應對忤旨好事撰此制以實之安有微行而顯著詞者首稱奏卿風狂尤為好矣當以本傳亦據其墓誌也唐貴進士科故誌言責授長江如溫飛卿亦謫方城尉當時謂鄉貢進士不博上州刺史則簿尉固宜謂之責授欲使今世進士得罪而責授簿尉則惟恐責之不早耳

姚少監集十卷

晁氏曰唐姚合也崇曾孫以詩聞元和十一年李逢吉知舉進士歷武功主簿富平萬年尉實應中監察殿中御史戶部員外郎歷金杭二州刺史為刑戶二部郎中諫議大夫給事中陝魏觀察使開成末終祕書監世號姚武功云

陳氏曰川本卷數同編次異



莊南傑集一卷

陳氏曰唐進士莊南傑撰與賈島同時

李汝歌詩一卷

晁氏曰唐李汝渤之弟也早從陳許辟一再謫官夷陵太和中為太學博士自號清溪子渤三詩附

殷堯藩集一卷

陳氏曰唐侍御史殷堯藩撰元和九年進士

章孝標集一卷

陳氏曰唐秘書省正字章孝標撰元和十四年進士

熊孺登集一卷

陳氏曰唐西川從事熊孺登撰元和中人執易其從姪也

施有吾西山集五卷

晁氏曰唐施有吾吳興人元和十五年進士以豫章之西山為十二真仙羽化之所心慕之因卜隱焉且以名其所著自為之

序

雍裕之集一卷

陳氏曰唐雍裕之撰未詳何時人

雍陶詩五卷

晁氏曰唐雍陶國鈞太和八年進士大中六年自國子毛詩博士出刺簡州唐志集十卷今亡其半

張南史集一卷

陳氏曰唐試參軍范陽張南史撰

唐史藝文志南史字李直幽州人以試參軍避亂于揚州再召之未赴而卒

王涯集一卷

陳氏曰唐宰相王涯廣津撰

袁不約集一卷

陳氏曰唐袁不約還朴撰長慶三年進士其年試麗龜賦

李紳追昔游集三卷

晁氏曰唐李紳公垂也亳州人元和元年進士補國子助教稷宗召為翰林學士累進中書舍人武宗即位拜中書侍郎平章事紳為人短小精悍於詩最有名號短李與李德裕元稹同時號三俊追昔游者蓋賦詩紀其平生所游歷謂起梁漢歸諒署升翰苑及播越荆楚踰嶺嶠上高安移九江過鍾陵守滁陽轉壽春留洛陽庶會稽分務東周守蜀鎮梁也開成戊午八月自為之序

陳氏曰皆平生歷官及遷謫所至述懷紀遊之作也余嘗書其後云讀此篇見其飾志矜能夸榮殉勢益知子陵元亮為千古高人

朱景玄集一卷

陳氏曰唐太子諭德朱景玄撰

朱慶餘集一卷

陳氏曰唐朱可久慶餘撰以字行受知於張籍寶曆二年進士

